

Museo Historico Aruba celebrando 35 año di amor y labor cultural

ORANJESTAD (AAN): Situa na un punto strategico di Oranjestad Museo Historico Aruba (MHA) ta un di e musconan mas stima di nos isla. E simpel hecho cu e edificio aki ta marca un punto importante den nos historia ta haci di dje un munumento carga cu balor simbolico pa cu nos desaroyo.

E edificio remarcabel aki ta data di 1792 na momento cu un comision militar na Willemstad a dicidi pa construi e fort pa proteha e territorio Aruba en bista di disturbionan cu a surgi den nos region relaciona cu ideanan revolucionario.

Playa Caballos (Paardenbaai) na e momento aki tabata desaroyando como un puerto cada bes mas activo y poco decada despues a dicidi di cambia e nomber di e pueblo aki pa Oranjestad (na honor di cas real Hulandes), accentuando e expectativa grandi pa cu e pueblo y territorio aki. Na momento cu por a conta cu e proteccion necesario cu Fort Zoutman a bin ta brinda mas y mas habitante a establece nan mes na Oranjestad en busca di un miho futuro.


E funcionnan di defensa, faro, oloshi di pueblo, oficina di gobierno, kazerne di Polis (pa menciona algun) cu tempo a pasa pa historia y mas bien cu tempo a adkiri un funcion simbolico como testigo silencioso pa cu e desaroyo di e isla y ala-

vez sentimento di identidad, preservacion di patrimonio y herencia cultural a bira relevante na e lugar aki.

Museo Historico Aruba a habri 35 año pasa cu meta pa presenta di un miho forma posibel diferente aspeccionan relaciona cu nos historia cultural. MHA, como e prome museo den e estructura di Fundacion Museo Arubano (FMA), tambe ta fungi como un ehempel pa preservacion di nos patrimonio historico Arubano y desaroyo di mas museonan na Aruba.

Na e momentonan aki ta preparando un exposicion adicional cu lo ser presenta den e museo aki pa fin di año pa asina elabora riba e diferente temanan treci dilanti den e espacionan di Museo Historico. Cu e informacion adicional contextual aki FMA ta spera di por stimula interes pa mas conocimiento, investigacion y rescate di nos herencia cultural. Tambe ta evaluando plannan pa restaura y engrandece e espacionan di e museo aki pa asina garantiza cu e lo por carga cu su funcion actual como museo pa hopi tempo mas.

Pa Museo Historico Aruba, situa den Fort Zoutman, ta un honor y tin e responsabilidad grandi pa sigui e pasonan di esnan cu a bringa pa salvaguardia y rescata e monumento aki for di inicio y cu a crea e museo aki na año 1984. Fundacion Museo



Arubano, cual a ser institui un decada despues tin como meta principal pa preserva, proteha y promociona nos patrimonio cultural. Museonan ta hunga un rol sumamente importante den desaroyo di un pais y ta ofrece un reflejo mas profundo di sucesonan y balornan cu a marca nos pasado y forma ken nos ta.

Cultura di Aruba en particular ta enfrenta retonan grandi pa por rescata mas tanto di nos herencia cultural cu ta posibel, mirando e desaroyonan cu continuamente ta sigui na un ritmo acelera. Esaki ta accentua e urgencia pa e sector aki efectua su labor debidamente. E meta principal ta pa garantizar futuro generacionnan conocimiento y acceso na nan historia pa asina nos cultura tambe forma parti di e Aruba sostenibel cu nos tur ta anhela.

